

**PARTE  
TERZA**

## NNIMINA, PRIERI, RAZIUNEDDI

### PRIERA DI MATINA

Beddu iornu ch'agghiurnastivu  
Quantu grazzii Diu m'ha datu  
Quantu grazzii e favuri  
Vi ringrazziu Signuri\*

### PRIERA DI SIRA

Eu mi curcu pi durmiri  
E nun sacciu chi ha muriri.  
Tri cosi v'addumannu:  
Cumunioni, estrema unzioni  
E ogghiu santu.  
Lu Patri, lu Figghiu e lu Spiritu Santu.

### PRIERA A SAN MICHELI ARCANGILU

S. Micheli arcangilu  
Putenti e forti  
Difinnitini 'nvita e morti.

### PRIERA

Eu mi curcu 'nta stu lettu e moru  
Mi raccumannu a Vui Matri rigina  
La Matri Santa mi varda sta notti  
Mi fa agghiurnari vivu a la matina.  
O quantu missi si dicinu a Roma  
ogni matina! O miu Diu mi cci trovassi  
Quantu tutti mi li virissi!  
L'arma mia voli gudiri!  
'Mparaddisu voli iri  
Di lu Celu siti calata  
O Cuncetta 'Mmaculata.

---

\* Queste belle preghiere mi sono state date dalla signora VIVONELLO MARIA.

## BAMMINEDDU ABBALLA, ABBALA

Bammineddu abballa abballa  
Chi lu chianu è tuttu tò  
Dunni posi lu tò piruzzu  
Nasci la menta e lu basiricò  
E nni cogghi 'na pampinedda  
E la porti a Maria la Bedda  
Maria la Bedda è supra l'artaru  
Tutti l'angili ci cantàru  
Ci cantàru a lietu visu  
Viva Maria di lu Paraddisu!  
Lu Paraddisu è dilicatu  
Viva Maria senza piccatu!

## RUSARIU DI SANTU VITU

Santu Vitu di Mazzara  
Cu lu vrazzu n'arripara  
E a lu populu chi n'è divutu  
Lu scanza di lu terrimotu.  
E lu mari è accussì granni  
Chi ni tagghia tutti quanti  
E ludamu pi tutti l'uri  
Santu Vitu lu prutitturi  
Oh gran Santu prutitturi  
Vui priati a lu Signuri  
A nui ni pirdunassi  
Di stu mali n'alluntanassi

## BAMMINEDDU 'NZUCCARATU E DUCI

Bammineddu 'nzucaratu e duci  
Du' palori vi vulissi diri si vi piaci  
Amu a fari 'un discurseddu senza vuci  
Vogghiu lu Paraddisu 'nsanta paci

## PRIERA PRIMA DI CURCARISI

Eu mi curcu 'nta stu lettu  
Cu Maria 'ncapu lu pettu  
Eu dormu e idda vigghia  
Si c'è cosa m'arruspigghia  
Mi cummogghia cu lu sò mantu  
Lu Patri, lu Figghiu e lu Spiritu Santu

## PRIERA A LU SANTU PATRI

Santu Patri, Santu Patri  
Siti chinu di caritati  
E viniti 'na vota nni mia  
Pi cunzulari la casa mia  
La casa mia è cunzulata  
O Cuncetta 'Mmaculata.  
Santu Patri miu diletto  
E quant'avi chi v'aspettu  
E nni tutti aviti iutu  
E nni mia 'un ci aviti vinutu!  
E viniti 'na vota nni mia  
Pi cunzulari la casa mia!  
La casa mia è cunzulata  
O Cuncetta 'Mmaculata!

## LA CUMUNIONI

Aiu un marzapani chiusu  
'Ncapu oru scrittu c'è  
Dintra 'un Diumanu prizziusu  
Chi 'nta lu munnu pari chi nun c'è.  
Caru profeta 'unn 'essiri cunfusu  
Chi ti lu dici lu nniminu soccu è.  
Poi scinni lu peri di iusu  
Fa lu fruttu e ti dici tè

## LU VERBU

Lu Verbu sacciu, lu Verbu ha diri  
Lu Verbu chi lassau nostru Signuri  
Quannu a la cruci s'innu a muriri  
Pi niatri dulenti piccatura  
La cruci ch'è tantu àvuta e tantu bedda  
'Un vrazzu 'ncelu e unu 'nterra  
'Nterra c'è lassatu un cunfissuri  
Pi putirini niatri cunfissari  
'Nterra c'è lassatu lu priricaturi  
Pi la vita d'iddu 'un si gghiustrari  
Cu sapi lu Verbu ria  
'Un c'è paura sutta ria  
Cu sapi lu Verbu 'ncosa  
'Un c'è paura di nudda cosa

## PRIERA CONTRU LU MALUTTEMPU

San Giovanni vucca d'oru  
Prima lu lampu e poi lu tronu  
E facitini una bona  
Senza lampi e senza trona

## PRIERA DOPPU LU RUSARIU

San Duminicu biatu  
stu rusariu a Vui fu datu  
a Maria la virginedda  
tutta pura e tutta bedda  
e offriri lu voi tu  
a Maria e a Gesù!  
A Maria vogghiu pi matri  
e Gesù pi nostru Patri  
tutti 'nzemmula e 'ncumpagnia  
san Duminicu e Maria!  
Mancamenti ci nni fussi  
mi l'aviti a pirdunari  
e Maria rispusi e dissi:  
figghia mia un ti dubbitari,  
lu tempu chi ci hai persu  
ti lu fazzu guadagnari.  
Tutta bedda siti Maria  
tuttu beddu è lu vostru visu  
pigghiati l'armuzza mia  
e vi la purtati 'mparaddisu.  
O buntà di paraddisu  
e chi mai v'avissi offisu  
ogn'unu, ogn'ura e ogni mumentu  
lu Santissimu Saramentu.<sup>140</sup>

---

<sup>140</sup> Questa preghiera mi è stata data da donna Sara.

## LI CENTU CRUCI

Gesù li centu cruci vurria diri  
si Diu mi li fa diri e cuncipiri  
lu sacru battisimu ch'appi a lu fonti  
mi fa viriri un tirribili ponti.

Anima mia di penitenza,  
corpu meu spirituali  
viri chi di stu munnu  
à trapassari!

Ma eu mi cunfissai e comunicai,  
li centu cruci mi li dissi,  
l'angilu Raffaeli mi li scrissi  
e mi li scrissi in memoria mia  
lu iornu di la Virgini Maria.

## RUSARIU DI LA BEDDAMATRI DI TAGGHIAVIA

Patri, Figghiu e Spiritu Santu.  
Decimila voti ludamu  
sta gran Signura.  
Ludata sempri sia  
la Madonna di Tagghiavia.

Vergini santissima chi ddocu siti  
quantu grazzi faciti!  
Facitini una a mia  
Beddamatri di Tagghiavia.



## A MARIA

Ludamu Maria  
Ch'in nostra avvucata  
Iddiu ci l'à data  
Pri sua carità.

Fu pura cuncetta  
E a Diu tantu cara,  
Chi d'Eva ripara  
La fraggilità.

In dannu e ruina  
'Ntra donni à concursu,  
E nata in succursu  
Di l'umanità.

Bambina a lu Tempiu  
Sua matri l'offriu,  
Poi Tempiu d'Iddiu  
Lu so ventri fu.

Un Ancilu santu  
Iddiu ci destina:  
<<Di grazia china,  
Ci dici,- si tu.

Tu matri sarai  
Ma lascia lu scantu:  
Lu Spiritu santu  
In tia scinnirà.>>

Lu tantu aspittatu  
Missia Salvaturi,  
Lu Diu redenturi,  
Da tia nascirà.

Cu summa umiltati  
Rispunni Maria:  
<< dispogna di mia  
La tua serva è cca.>>



Già datu st'assensu  
Cu cori sinceru,  
L'augustu misteru  
Compitu è di già.

Sintiu Lisabetta  
Da tia visitata  
'Na ciamma beata  
Nell'uteru so.

So figghiu Giovanni  
Saluta, non natu,  
lu verbu incarnatu  
Tra l'utero to,

Chi vinni a purtari,  
Tra notti profunna,  
La luci secunna  
Chi salvi ci fa

Ho mati biata  
D'un Diu Salvaturi  
Ahi! quantu duluri  
Lu to curi avrà!

Appisu a 'na cruci  
Sarà tra dui latri,  
Ahi misera mati  
Chi pena avrai tu!

Vidirlu spirari  
Tra peni ed affanni,  
Martiriu granni  
Nun po darsi chiù.

Di tanti toi peni,  
Di meriti tanti,  
Curuna brillanti  
Tua gloria sarrà.

To figghiu, ch' è in celu,  
Ti chiama a godiri  
L'eterni piaciri  
Pri n'eternità.

Rigordati o matri,  
Di nui bisugnusi;  
Deh! L'occhi pietusi  
Affaccia di dda!

Ti mova a pietati  
Sta valli mischina,  
Di lagrimi china,  
E nui tutti cca.

Li nostri duluri,  
Li peni ti offremu,  
Ma nui chi putemu  
Offriri di chiù?

Ti offremu li cori  
Cuntenti e piatusi,  
L'eterna saluti  
Impetranni tu<sup>141</sup>.

---

<sup>141</sup>MELI G., *Opere poetiche*, Edito da C.E.M., Napoli 1977



**Vita - Chiesa Madre - Interno**